

## **Zašto je izostanak iz škole vrhunski patriotizam?**

Prije neki dan ponavljam sa djetetom „Prirodu i društvo“ i dođosmo do Drugog svjetskog rata i antifašističkih pokreta. Naravno tamo su ravnopravno stajali ravnogorci ili ti četnici i partizani.

Kao odgovoran otac rekoh mu da to nije tačno, da su partizani jedini istinski antifasisti, a da četnici možda nisu bili ideološki fašisti, ali su bili sluge okupatora i domaći izdajnici, zajedno sa Belom gardom, ustašama, Handžar divizijom, Ljitićevcima, Balistima i ostalim ljubiteljima Musolinija i Hitlera.

Onda mi sin postavi jedno vrlo jednostavno pitanje, a kako da znam da je to što ti govoriš istina, a ne ono što piše u knjizi?

Fakat, nezgodno pitanje, jer ako udžbenici lažu oko ovoga, zašto vjerovati bilo čemu u njima, od evolucije do francuske revolucije?

Krenem ja da se vadim, te partizanske ofanzive, te poziv kralja Petra četnicima da se stave pod komandu Tita, te zločini koje su četnici počinili, ali nisam siguran da sam baš bio uvjerljiv. Možda je najjednostavnije bilo da ga istučem, jer na taj način se najlakše sprečavaju neprijatna pitanja.

Zašto vam ovo pišem?

Zato što se škola kod nas nikada nije otrgla od politike i samim tim njen zadatak nije da nas obrazuje, nauči da tražimo činjenice, da ih poredimo i analiziramo, već da bubamo manje ili više napamet informacije, ne shvatajući za šta će im to biti potrebno ili korisno. Nije to problem samo istorije/ historije i povijesti, to se odnosi i na biologiju, fiziku i mnoge druge predmete.

U pitanju je čista indoktrinacija.

Škola našu djecu priprema za budućnost, ali budućnost po mjeri vlasti, a znamo kakve su nam vlasti u Bosni i Hercegovini.

Ako je ovo tačno ili približno tačno što sam napisao onda je izostanak iz škole, bježanje sa časova i neučenje vrhunac patriotizma u Bosni i Hercegovini i nenasilan oblik borbe protiv sadašnjeg društva, ali i očuvanje zdravog razuma.

Zato se ne treba buniti kada god djeca nemaju nastavu, to je za njihovo dobro i cijele Bosne i Hercegovine.

I zato treba podržati skraćenje nastave u Sarajevskom kantonu zbog ramazanskog posta, a vaskršnji tj. uskršnji raspust treba da traje povećan sa pet na deset radnih dana.

U periodu kada ne idu u školu oni neće učiti da je njihova religija superiornija od drugih, da su oni junački narod, a svi ostali kukavice, da su oni jedini žrtve, dok su ostali zločinci. Neće naučiti da su njihov jezik, a bogami ni pismo, najsavršeniji i da su ostali pokrali njih i napravili svoje jezike. Neće imati ni dilemu ko je u pravu: vjeronauka ili biologija.

Sada se vi jednostavno pitajte, pa ko će nam onda obrazovati djecu?

Odgovor je jednostavan, jutjub, instagram, tik tok, ulica, što možda i nije tako loše, jer iz toga se neko može i izvući, a posle trinaest godina sistematske indoktrinacije to će poći za glavom malo kome.